

nato da Modon, et li a Corfù hanno armà do fuste, una di banchi 22, l'altra di 20, con homeni di le ville per non haver altre zurme; et questo hanno fato con li danari li mandò el zeneral; et ditte fuste partirano doman, et ancora non erano zonti li danari per li provisionati. *Item*, è nova che a Modon nostri con le artilarie hanno fato gram danno a' turchi, qualli a presso la terra erano venuti.

*Di sier Lucha Querini, provedador di Corfù, di 20.* Come, a di 15, zonse la nave di sier Beneto Zustignan, patron Simon di Alberto, a la qual bisogna conza; et, a di 16, zonse la nave patron Polo Bianco, la qual anderano in armada.

*Di Zorzi Negro, secretario fo dil zeneral, do letere di 15 et 16, in galia.* Come il zeneral andava manchando *continue* la virtù; et il medico confortava sua magnificentia ad andar a Corfù; qual li disse, el meriteria esser apichà per la golla a lassar questa armata; e non si volse mover. Et scrisse al provedador Contarini, qual era avanti; et cussi convene star un zorno e una notte in mar, con provenza ruza, che dava grande affano al zeneral. Et, a di 14, si levò per andar con l'armada verso la inimicha, la qual era a la Zefalonia, e mandò tre galie a la varda; qualle vete uno bregantim e una fusta, li dete drio; l'horo dismontono in terra, scapolò li homeni, pur ne fo morto uno; et nostri preseno le fuste e il bragantim vuode; et cussi navegando il resto di l'armada le veteno venir. Erano nostri galie 14 sotil; il resto era col provedador Contarini e col Pixani e le galie grosse. Or ebbero vista di l'arma' turcha, et appropinquati mia 4 in 5, *tandem* con remi se retirono nostri verso l'altre galie sotil et grosse, essendo stati perhò un zorno e una notte in mar. Et mandò 4 galie avanti; et la galia, sopracomito sier Alvise Michiel, mandò a chiamar il provedador Contarini; et cussi a di 16, vedendo il zeneral esser quasi morto, reduti su la galia dil capetanio Venier, il vice capetanio di le nave e li sopracomiti feno vice zeneral ditto sier Giacomo Venier, fino veniva il provedador Contarini, acciò l'armada non stesse senza governo. Et par, che a di 14 l'arma' turcha venisse contra la nostra; poi andò verso il Cao, e a mezo zorno deteno vella verso levante, et perhò nostri mandò le 4 galie driedo, chome ho dito di sopra.

*Dil ditto secretario, a li Guardiani, a di 18.* Come a di 17, a hore 3 di note, con li hordeni ecclesiastici passò di questa vita sier Marchiò Trivixan, capetanio zeneral nostro, qual non à manchato *etc.*; e dil corpo el vice zeneral non li à parso far 0, fino non vengi li proveditori; et manda una letera abuta

da sier Hironimo Contarini, provedador, di 17, dat Zante.

*Di sier Hironimo Contarini, provedador di l'armada, data in galia al Zante, a di 17, drizata a Zorzi Negro.* Come à inteso il caso dil zeneral; li comanda vengi avanti con l'armada, et fazi restar do galie a far venir il resto de li al Zante. Avisa haver retenuto le 14 nave di Soria, et che con bon cuor anderà sequendo l'arma' inimicha.

È da saper, per letere particular se intese, ditto zeneral esser stà tre di senza parlar e à penato assai a morir.

*Di sier Giacomo Venier, vice capetanio zeneral, di 16, in galia, a li Vardiani.* Scrive la election sua, vice zeneral, e dil modo, con molte zanze; l'accepta, et farà di unir l'armada, e saper quello fa i inimici, li qual sono stati con l'armada alla Zefalonia 6 zorni, et hanno posto dentro 600 turchi, et à depreddà l'ixola *etc.*

*Dil ditto, di 18, a Porto di Custodi.* Replicha, l'arma' turcha haver fato molti danni su l'isola di la Zefalonia, et a di 14 si levò; va di fuora via verso levante, et molti turchi per terra la va sequendo. Questa dia esser a Castel Tornese; nostri l'anderà seguitando con tuta l'arma'. *Item*, è venuto uno bragantim dil provedador Contarini a lui, et li ha ditto il provedador Pixani è con lui. Lui vice zeneral ha galie sotil 14, grosse 13, nave 7; et a hora, scrivendo, comenza a navegar, per sequir li inimici.

Noto, ozi fono expedite le letere in Hongaria a li oratori.

*A di 5 agosto.* In colegio vene l'orator di Fran- 229  
za, al qual li fo comunicato la diliberation nostra, scritta in Hongaria; lui parlò di la liga general *etc.*

Fo baloà monitiom molte per armada, justa lo aricordo dil zeneral nuovo, et ducati 600 per uno a li oratori, uno per Roma, e l'altro per Spagna.

*Di sier Marco Orio, vice capetanio di le nave, data a di 18, in Porto di Custodi.* Di la election fata dil Venier, vice zeneral, erano 17; e fato sier Andrea Foscolo vice capetanio di le galie grosse.

*Di Vegia, dil provedador.* Come havia electo patrom di la fusta l'armiraio de li; poi ricevette letere, mandasse de qui li ducati 200, sì che l'aria armata. *Item*, scrive di l'ajuto mandò da quella isola a Nona, quando turchi vi fue.

*Di Udene, dil luogo tenente e provedador.* Manda una letera abuta di madona Dorathea e il conte Zuanne di Corbavia, quali li scriveno voria danari per mandar et pagar li soi exploratori, manda a saper li andamenti di turchi.